

Regd. No. RNI. NAGAAO/2004 / 13113. Postal-NE/RN-717.

e-mail : tiryimyim@gmail.com

TAPAK 8 Yangia anidakangma : Tir Yimyim tiryimyim@aolima tir yimyim TAPAK 7

Daniel Wiffen-i 800m freestyle  
nung otsü tasen ka yangluogo

Philippines-i China indang  
ambassador jaok

VOL. XXI NO. 65 (ADOK 65) DIMAPUR SANGTENNÜ (TUESDAY)

LUCHII (DECEMBER) 12, 2023

₹ 5.00

Hornbill Festival nung shilem agir ajak dang pelar

Raj Bhavan nung Viksit Bharat@2047 Voice of Youth tenzük

Kohima, December 11, 2023 (DIPR): 24 buba Hornbill Festival takok ngua amongba atema pelar aser iba atema Nagaland nung alirtem nem tenüngsang agütsür ta Chief Minister Neiphiu Rio-i ashi.

"Hornbill Festival ya teti Nagaland nung sobaliba balala, inyaksangshi aser tangatetba benjungba mapang ka ama lia arur" ta CM Rio-i Tourism and Higher Education Minister Temjen Imna Along dangi züluba shidi ka nung ashi.

Iba benjung ajanga Nagaland senmang balala indang sayuogo aser sobaliba lemsatepba sabang ka dang masü saka loktrongsenketzung renlokogo, ta pai ashi.

"Festival of Festivals" ta

**NESO-i CAA anema 'Black Day' among**

Guwahati, December 11, 2023

(Agencies): Northeast state tem nungi kaketshirtemi Hombarnü "Black Day" mongogo.

India nung Citizenship Amendment Act (CAA) agizüker küm pezü ajungba anogo nung Northeast Students' Organisation (NESO)-i Black Day ayongzüka among.

Northeast state ajak nungi CAA magizüki lungkak aitaka December 11, 2029 nü Rajya Sabha nung CAA agizüka liasü. Iba atema tejashi sayua tanü Northeast state tenet kübok tongtipang tesemtem nung wako

tanak aser banners yutsüogo.

NESO nung Khasi Students' Union (KSU), All Assam Students' Union (AASU), Naga Students' Federation (NSF), Mizo Zirlai Pawl (MZP), Twipra Students' Federation (TSF), All Manipur Students' Union (AMSU), Garo Students' Union (GSU) aser All Arunachal Pradesh Students' Union (AAPSU) dena lir.

Centre sorkar dang onoki CAA magizüker aser anema noktaker ta osang sangoktsütsü atema onoki "Black Day" amonger ta NESO-i ashi.

**MLA Wangpang Konyak-i tezungzüktep agiogo**



Kohima, December 11, 2023

(DIPR): December 11, 2023 nü 43-Tapi (ST) Assembly Constituency nungi NDPP MLA Wangpang Konyak-i tezungzüktep agiogo.

Nagaland Legislative Assembly Speaker Shringain Longkumer-i Wangpang nem tezungzüktep agidakstsü.

Iba sentong nung Forest, Environment & Climate Change, Village Guards Minister C. L. John aser Prison & Stationery Advisor Kropol Vitsu na den Wangpang'er constituency nungi party züngsemtem aden.

NLA Secretary-In-Charge Khruohtuonuo Rio tsüngdang MLA Wangpang-i Assembly nung Roll of Members nung sign asü.

November 7, 2023 nü by-election agiba indang results December 3 nü adokdang Wangpang-i Congress candidate Wanglem Konyak madak votes 5,333 agi takok ngua liasü.

By-election nung Wangpang-i votes 10,053 aser Wanglem-i votes 4,720 nguteta liasü. August 28, 2023 nü NDPP MLA Noke Wangnao asüba ajanga iba menden atema by-election agitsusa aküm.



December 11, 2023 nü Dr. Imkongliba Ao Hall Raj Bhavan nung Governor La Ganesan-i Viksit Bharat@2047 tenzükba sentong nung o jembiba angur.

Dimapur, December 11, 2023

(TYO): December 11, 2023 nü Raj Bhavan, Kohima nung Prime Minister Narendra Modi-i video conference ajanga lapoktsüba Viksit Bharat India@2047 -Voice of Youth sayua liasü.

Iba sentong nung Nagaland nung University aser Central Institutions nungi Vice Chancellors, Deans, Directors aser faculty züngsemtem aden.

"India putiotsü nung temelensi aruba mapang ka nung lir aser putu 21 buba ya India'er putu asütsü" ta Governor La Ganesan-i ashi.

"Tanü India ya alima nung 5th largest economy lir aser 2027 tashi nung 3rd largest economy akümtsü kechiyong asen linük yongsük crore 144 shi lir aser GDP USD 5 trillion adentsü imlar.

Viksit Bharat@2047 ajanga India ya USD 30 trillion economy tonga developed nation ka akümtsü" ta pai ashi.

"Sorkari tesüiba kümtem policy aser scheme balala ajanga lokti aser rongsenketzung wadang kanga tuluba kümogo.

Linük nung education, healthcare, digital connectivity, transport infrastructure expansion, information technology amala wadang kanga tajungba kümogo" ta Ganesan-isa ashi.

"Tanü India kanga dang tongtipang lenjem ka nung noktaka lir aser iba mapang lanurtem shilem angatetsüla.

India nung lanur nütsüng yongsük crore 144 shi lir aser alima nung lanur teimba aliba

linük rongnung ka lir. Alima nunng lanur nütsüng yongsük 20% ji India nung lir aser iba ya maongka ka lir" ta paissa metedakstsü.

Iba tangatetba nung Viksit Bharat@2047 asadanga tenzük aser 2047 nung India nüjiso ngur küm 100 ajungdang linük renloker alitsü atema nükjidong lir. Iba ajanga lanuputu dang parnok tangatetba, teimla aser inyaknubatem mapa küma inyaktsü ajungmesor ta Ganesan-isa ashi.

Asenoki Viksit Bharat akümtsü merangdang linük yangerba maparen nung lanur tangatetbatem bendenloktsübai kanga tongtipang, ta paissa shisem.

Governor-isu University vice Chancellors aser shisaliok reju nung tekolakpurtem dang pei pei reju nung sentong balala agitsü aser iba campaign nung kaketshirtem nem shilem agidakstsütsü atema tayongzükba agütsü.

Linük yangerba maparen nung asen kaketshirtem shilem agitsü ajungmesotsüla kechiyong asenoki iba ama tongtipang campaign ya takoksa majurudakstsütsüla ta Ganesan-isa ashi.

Iba sentong nung "Thriving and Sustainable Economy" ta ser panel discussion ka liasü aser iba nung onirji Nagaland University, Lumami Vice Chancellor Prof Jagadish K Patnaik liasü.

**Lisopur telok kati Christmas nung Khristantem anema rally ka agitsü**

Agartala, December 11, 2023

(Agencies): Tripura nung Janajati Suraksha Mancha ta ser lisopur temeten atema noktakba teloki December 25 nü Khristan yimsü agizükba lisopurtem dak nungi Scheduled Tribe (ST) jenjang agentsü atema sentong ka agitsü atema mangatetep adoka lir.

Congress aser CPM teloktemi Janajati Suraksha Mancha ya RSS-i pusema nungiter ta tai tongloksü.

Iba ya kin ka mesüra tamangba yimsü ka anema masü saka Khristan yimsü agizükertemi tajangzük ana agiba anema lir ta Mancha züngsem Milan Rani Jamatia-i ashi.

1966-67 nung tamangba yimsü meiyipba lisopurtem delisting takhangba mezüng agütsü aser iba atema 1970 küm Joint Parliamentary Committee-i ashiba den küleme demand list ka Prime Minister nem agütsü.

"Chalo Delhi" sentong nung

nisung lakh pungu shi adentsü imlar aser India Tir nem memorandum ka agütsütsü ta Mancha züngsem Binud Kumbang-ia ashi.

Tripura Tribal Areas Autonomous District Council nung state nütsüng yongsük 30% jungnua lir aser iba ashishitep onük ya iba tesem nung tongti süa rangloker.

Tamangba yimsü meiyipba lisopurtemi sobaliba aser inyaksangshi wazuka ayuba nung tetsüdkakstsü bentsür arun anungji parnok ST list nungi agentsüla ta Mancha convener Santi Bikash Chakma-ia ashi.

Ajisüaka, CPM, Congress, People's Congress aser TIPRA Motha dena Opposition party temi Mancha dak tai tongloksü. Parnoki tasa ka atonga lir aser lokti nung mepetmesü adokdakstsütsü meranger ta Opposition-i ashir.

"Khristan yimsü agizükba ajanga lisopur maitsü nung

kongshira iba ajanga lisopur nütsüng yongsük aser reservation benefits ajema akümtsü" ta taoba minister Naresh Jamatia-i ashi.

Iba takhangba ya ozüngi memlar, jashitep adokstsü aser telesma adokdakstsüba politics lir ta Congress lennir Sudip Roy Barman-ia ashi.

Ajisüaka, ib onük nung BJP aser parnok den yariteper Indigenous People's Front of Tripura (IPFT)-ibo ola madoker.

"Nübertem rongnung telesma adokstsü mapa inyakba aitsür. Tamangba yimsü nung ammeter lisopur tsüngda telesma adokstsü inyakba atema tebilemtsü abener, asenoki telongjem ang nüngdaker" ta TIPRA Motha tanishir Pradyot Kishore-ia metedakstsü.

"Mancha-i lungkak aitsü ayongzükba aitsür aser iba ya Hindutva tashitemi tasa atonga inyakba mapa ka lir" ta Tripura Peoples Party-ia metedakstsü.

## Mokokchung DPDB senden aser Khristmas yongya sentong agi



Deputy Commissioner, Mokokchung indang Conference Hall nung December 11, 2023 nü Mokokchung DPDB meeting cum Advent Christmas sentong agidang Deputy Commissioner & Vice Chairman DPDB, Mokokchung, Thsuvisie Phoji-i ojembidang tangokba noksa nung angur.

**Dimapur, Luchii/December 11 (TYO):** Mokokchung District Planning and Development Board (DPDB) ita shia amenba senden den külemi Khristmas yongya sentong ka December 11, 2023 nü Deputy Commissioner, Mokokchung indang Conference Hall nung agia liasü.

Iba senden nung mendenpuba, Deputy Commissioner & Vice Chairman Mokokchung DPDB, Thsuvisie Phoji-i tarur bela agizükba den benjong salem lemsatepa liasü.

Taoba senden nung lemtetba lepa reprangshiba mapang, DEP Police Church nungi Yisemyong tashi NH 61 lenmang majungba anepalua mera balala agitsü atema E.E. (NH) dangi yoka

liasü, koba benjong mapang senzüempenger asoshi timtem ajurutsiisa raksar lir.

Mezungbuba Mokokchung District inter department sports tournament takok ngua agiteta osang iba senden nung organizing committee ajanga agüja liasü aser teloki iba asayamung ka yum shia ayongzüksü lemtet.

Ungma (Soyim) village ya Heritage village ta nüngja agütsüsü, Govt. High School Dilong aser Govt. High School Changtongya (B) na Higher Secondary School jenjangi ajungkettsü asoshi tim ketdangsür dangi recommendation agüja liasü.

Maneni benjong mapang tonga arur aser nisung ajaki

kinungertem den benjong amungtsü yongyatepa lir, anungji iba tangatetba nung Mokokchung DPDB pur Khristmas yongya sentong agia liasü.

Iba sentong nung DC & Vice Chairman DPDB, Mokokchung, Thsuvisie Phoji-i züngsem ajunga den Khristmas salem lemsatep aser Principal ITI Mokokchung, Er. Imlisunep ajanga "Christmas to me" ta asüba onük nungi o tatsüka jembia liasü.

Iba sentong ya Dr. Sentilu, DFO Mokokchung lenisüba kubok agi, Janmonger, ADS ajanga sentong tenzüka sarasadem aser Punen aser Wapangla nati temeja ken tajung ka tena liasü.

## KMC-i Cleanest Ward Award 2023 sempet agütsü

**Dimapur, Luchii/December 11 (TYO):** Kohima Municipal Council (KMC) ajanga Cleanest Ward Award 2023 sempet agütsüba sentong ka Capital Convention Center, Kohima nung December 11, 2023 nü ayongzüka liasü.

Cleanest Ward sempet ya Agri, Electrical aser Forest colony ward number 17 nem agütsü, tanabuba jenjang ya

Midland colony ward number 9 nem aser tasembuba jenjang ya Hospital colony ward number 10 nem agüja liasü.

Cleanest Shop Category 2023 kubok mezüngbuba jenjang ya T.T Stationaries Bayavu, tanabuba jenjang ya Storage Hardware Pezielietse aser tasembuba jenjang ya Sushil Pan shop Phoolbari nunger temi

agizuka liasü.

Kasa mapang Cleaner Kohima asoshi shilem agiba atema pelaba kulizing kaket Don Bosco College Kohima, Forest Colony, Ao Kaketsirir Telongjem Kohima aser Kho-o SHG Bayavu nunger nem agüja liasü. Takok angur ajak nem senpet sen, running trophies aser kulizing kaket agüja liasü.

## Excise ketdangsürtemi sen lakh 36 jenjang yi/mozü raksa indok



**Dimapur, Luchii/December 11 (TYO):** Excise Directorate Complex, Dimapur nung Liquor/Drugs Destruction Board ajanga NLTP Act 1989/NDPS Act 1985 kubok ozüng agi melaba ama December 11, 2023 nü sen lakh 36 jenjang yi aser temesepba mozü raksa indoka liasü.

Iba mapang pua aliba yi ya excavator agi ajensa aser temesepba mozü ya mi agi rongdoka liasü.

Item yi aser temesepba mozü ya Dimapur nung aliba District Excise, Mobile Squat aser Narcotic Cell ajanga

February nungi November 2023 tsüngta apuba liasü.

Hombarnü raksa indokba yi aser temesepba mozü telesma yamai liasü:

- Assorted IMFL/Beer - 13,426 bottles,
- Codeine based cough syrup - 1,200 bottles.
- Heroin - 604 grams.
- Ganja - 11 kgs.

Kasa mapang case compounding nungi revenue ama sen lakh tenet deposit süogo.

Item yi aser temesepba mozü raksa indokba sentong nung menden ya Dy.

Commissioner of Excise (NC) liasü, Asst. Commissioner of Excise (ENF) ajanga sarasadem aser item oset apuba osang ya Superintendents of Excise Dimapur Dist., Mobile Squad aser Narcotic Cell nungi agüja liasü.

Ita ishika tsüngta, aser talisa benjong mapang Excise Enforcement personnel temi mapa tajung inyaka yi aser temesepba mozü apuba asoshi Commissioner of Excise, H. Atokhe Aye (NCS) ajanga tenüngsang agütsü aser maneni tarutsü anogotem nunga saksalema inyaktsü ayongzüka liasü.

## KIBONG KÜMER KÜM 50 AJUNGBAMUNG

Takok aser Tepela

Ozü temeim Tsürabur ana den lemsateper


PEI DANG APUANI TAOBA MEIMBA TEMEIM & MAMATOKTETBA TEMENUNGRATSÜ ANOGOTEM AGI KÜM 50 TASHI LITETBA TAKOK ASOSHI NENAPRONGLA NEM TENÜNGSANG AGÜTSÜR

12th December (1973 -2023)

Mr & Mrs. L. Chuba Pongan

Onoki nena kanga meimer,

NER JALA 3, SEMCHIR 6 & ANÜK APANG 3.



"Onoki nenok dang benshiba ama, Kibubai nenok temeim tuluba kümdakjang aser nenok kati ka den aser ajak dang meimba temeim moshidakjang."

1 Tesalonika 3:12

## CANSSEA sanen luden senden ayonger

**Dimapur, Luchii/December 11 (TYO):** CANSSEA

Executive committee senden ka December 15, 2023 anüngdang 12:00 ako nungi CANSSEA indang Conference Hall nung amentsü, ta CANSSEA

ketdangsür Dr Ilang ajanga sangdong ka nung ashi.

Iba senden nung district units ajunga nungi Executive aser affiliated Associations shia nungi züngsem ana-na arua adentsü ayongzüker, ta sangdong ajangasa ashi.



All India Health and National Health Mission Employee's Federation (AIHNEF) ajanga totuyuba agütsüba ama IMDH, Mokokchung nunga December 11, 2023 nü mass rally ka ayongzüka liasü. AIHNEF nungya Central aser State level scheme aser sentong balala nung contractual aser outstanding employees tem lir aser parnoki India Health and National Health Mission nung inyaker ajak sorkar mapa inyaker ama sangdongtsü, arishi küm 65 tashi job security agütsü, Outsource employee ajunga nem sorkar ajanga itasen indang-indanga agütsü, social security benefits aser "Employee Welfare Commission" amenoktsü takhangba agüja iba rally ya ayongzük.

## Mezungbuba Meluri Winter Fest 2023 tenzükogo

**Dimapur, Luchii/December 11 (TYO):** Anogo ana, December 11 & 12, 2023 asoshi First Meluri Winter Fest sentong Meluri local ground nung "Fostering Oneness" omen kubok Hombarnü tenzükogo.

Iba sentong ya ADC Meluri, Albert Ezung lenizüba kubok District Administration, Police ajanga Head of offices Meluri, Village council Meluri, Meluri Public Area Organisation (MAPO), Müluori Shefüri Küghari (MSK), Müluori Küchiyiri Küghari (MKK), Women Welfare Society Meluri Town, Meluri Town Business Union (MTBU), aser Joint Wards Co-ordination Committee (JWCC) den lungjemer ayongzüka liasü.

Iba benjong tenzükba sentong nung tesemdanger tongti ka ama Pochury Hoho tir Chonpa Jurry-i moatsü aser Meluri nung iba ama tebour tajung benjong ayongzüka asoshi ADC Meluri aser benjong ayongzüker dang pelaba ashi.

Nagaland sorkari Meluri ya district temeja ka ta principle nungbo agizükba lir, aser nübertem aginüba ama yakta district temeja agütsü imlar, ta pai ashi.

Tatishitsü tajung amshitsüa sentong tulu ayongzüka asoshi ketdangsür nem Jurry-i tenüngsang agütsü aser omen nung ajemdaker jembidang, kin balala nungi adianutem tsünta ka ama lungjeba ajanga Meluri nung alir aser Pochury nungerem asoshi kisüng masü saka state aser liniik ajunga nung yimzung alitsü imlar, ta ashi.

ADC Meluri, Albert Ezung-i iba benjong ayongzüka nükjidong rateta ashidang, tang mezüngbuba ayongzüka Winter Fest ya Pochury aser nübertem asoshi alima dang kishi lapoktsür ama asütsü, ta ashi.

Nagaland sorkari Meluri ya district temeja ka ta principle nungbo agizükba lir, aser nübertem aginüba ama yakta district temeja agütsü imlar, ta pai ashi.

Iba sentong nung Tsirutho Nyusou, VCC Meluri aser convenor JWCC Rieniesie Ngouri natia o tatsütsü jembia liasü.

BJP-i Madhya Pradesh nung CM menden atema Mohan Yadav shim



December 11, 2023 nü Bhopal nung Ujjain South nungi BJP MLA, Mohan Yadav (tiyong) Chief Minister menden atema shimba sülen taoba Madhya Pradesh CM Shivraj Singh Chouhan (abelen) aser state BJP Tir, VD Sharma nati pa nem tetushi agütsüdang tangokba noksa nung angur.

**Bhopal, Luchii/December 11** (Agencies): Tawa Madhya Pradesh assembly election nung BJP-i takok anguba sülen Hombarü BJP-i Madhya Pradesh nung Chief Minister menden atema Mohan Yadav shimogo.

Mohan Yadav ya Ujjain South assembly constituency nungi BJP MLA lir. Taoba mapang Shivraj Singh Chouhan-i aniba sorkar nung pa Higher Education minister liasü.

Yadav-i tang agi tasembenbuba assembly election nung takok nguogo; pai Shivraj melentsü. Shivraj-i MP nung küm sükpezüben (term) tashi CM inyakogo.

Hombarü BJP central

observers- Haryana Chief Minister Manohar Lal Khattar, BJP National Secretary Asha Lakra aser Rajya Sabha MP K Laxman nungeri legislative party senden ka ayongzuka amenba mapang nung MLA temi BJP Legislative Party

nung lenir asütsü atema Mohan Yadav shima liasü.

Madhya Pradesh nungsa Deputy Chief Minister anaji Jagdish Devda aser Rajesh Shukla na asütsü aser Assembly Speaker ji taoba mapang Union Agriculture Minister Narendra Singh Tomar asütsü. Tomar-i tawa Madhya Pradesh assembly elections nung toktepa takok angu.

CM menden atema Yadav shimba sülen taoba Madhya Pradesh CM Shivraj Singh Chouhan aser state BJP Tir, VD Sharma na densema party lenirtemi pa nem tetushi agütsü.

CM menden atema shimba sülen Yadav-i pa ya BJP atema tilateri inyaker ka dang lir, ta shia pa CM shimba atema pai party dang pelaba lemsatep.

November 17 nü Madhya Pradesh nung Legislative Assembly elections agia liasü aser December 3 nü vote zünga osang sangdong.

Assembly menden 230 aliba state nung BJP-i menden 163 nung takok angu aser Congress-i menden 66 nung dang takok nguteta liasü.

## Mahua Moitra-i la Lok Sabha nungi agienba anemaken o benoktsü

**New Delhi, Luchii/December 11** (Agencies): Hombarü Trinamool Congress lenir, Mahua Moitra-i Supreme Court ajuruogo; taoba hopta la Lok Sabha nungi jendokba anema lai SC nung temepishiba ken o benoktsü atema jembigo.

'Cash for query' ochimashi ken o dak sendakba nung December 8, 2023 nü la Lok Sabha nungi jendoka liasü.

Arrshi küm 49, Mahua Moitra-i Parliament nung sorkar anema tasüngdangba katsüba atema lai businessman, Darshan Hiranandani ket nungi sübokrem sen crore 2 den

jenjang tasak oset aika sübokrem agiogo, ta la nem tai tonglokja lir; iba ken o dang 'cash for query' ajar.

Laisa kanga tongtibang parliamentary website 'login' lemsatep aser ibaji ajanga H i r a n a n d a n i - i t a s ü n g d a n g b a t e m indangindanga asüngdangtet, ta la nem tai tonglokja lir.

Moitra-ibo lai sübokrem khenyongi magi, ta ashir saka lai login lemsatepogo ta nangzükogo. Laisa, ibaji lai dang masü saka MP temi kanga bulua benshir, ta ashi.

November ita nung

Ethics committee-i la Lok Sabha nungi agentsü benokba sülen la aser committee tongti na tsüngda mangatetep adoka liasü. Iba mapang nungji lai, committee tongti la dang tim masüba tasüngdangbatem asüngdang, ta aitsü.

Tesüsa committee indang report ji December 8 nü Lok Sabha nung benok.

Hiranandani indang affidavit nung ajemdaker la Lok Sabha nungi jendok. Iba sülen BJP aija Moitra-i, lai iba ken o atema taruba küm 30 tashi raratsü, ta jembia liasü.

Vasundhara-i la nem küm ka danga

Rajasthan CM inyakdakjang ta mepishi New Delhi, December 11 (Agencies): Tawa Rajasthan assembly election nung BJP-i takok anguba sülen tang tashi chief minister menden atema shinga meshimi alidang taoba mapang chief minister, Vasundhara Raje-i BJP National Tir, JP Nadda dang la nem küm ka danga Chief Minister inyakdakjang, ta mepishia liasü.

Amongnü anepdang BJP MLA kar Vasundhara Raje'er kidangi oa la ajurua liasü.

Rajasthan nung assembly menden 200 nungi BJP-i menden 115 tashi nung takok angu aser Congress-i menden 69 ngua liasü.

Karanpur nungbo Congress candidate ka ajungbena süadokba agi election magi. Iba menden atema January 5 nü election agitsü aser January 8 nü election osang sangdongtsü.

Defence Minister Rajnath Singh densema party Observer asem leniba nung BJP legislature party senden amendang Chief Minister shimtsü.

Amongnü Congress MLA aser Rajasthan Adivasi Meena Seva Sangh Tir, Ramkesh Meena-i shidi ka ajanga party bangdak lenirtem dang CM menden atema tribal lenir, Kirodi Lal Meena shimmang, ta mepishia metedaktsüogo.

Kirodi Lal Meena ya Sawai Madhopur nungi BJP MLA lir.



December 11, 2023 nü New Delhi nung Supreme Court-i Arrla 370 pusema obendang agütsüba sülen advocate, Irfan Hafeez Lone-i osangbenertem den jembidang tangokba noksa nung angur. Supreme Court-isa sangküm September 30, 2024 tashi nungbosa Jammu & Kashmir nung assembly election agitsü tuyuogo.

## Supreme Court-i sorkari Arrla 370 agienba pusema obendang agütsü

**New Delhi, December 11** (Agencies): December 11, 2023 nü Supreme Court-i

tamalen Centre sorkari Jammu & Kashmir nung Arrla 370 election ayongzüka agitsüla aser tekeratiba nung state jenjang tanaben agüjang, ta tuyuogo.

"Onoki Election Commission of India dang 2024 küm September 30 tashi nungbosa Jammu & Kashmir Legislative Assembly election agitsü atema mera agia inyaktsü tuyur," ta Chief Justice of India-i obendang zünga metedaktsü.

SC-i, 2019 küm August ita nung Tir tetuyuba ajanga Arrla 370 (3) kübok tashi amshiba nungji kecha timtem mali, anungji Tiri iba tashi amshibaji tim dang, ta metedaktsü.

CJI-i, "State nung raraba tensa aliba ajanga Arrla 370 ya khenpiga atema benokba dang liasü. Tezüluba ajanga-a iba ya khenpiga atema dang liasü ta sayur," ta metedaktsü.

2019 küm August 5 nü Centre sorkari Jammu & Kashmir nung Arrla 370 agien aser Jammu and Kashmir Reorganisation Act of 2019 benoka liasü aser ibaji ajanga Union territories of Jammu & Kashmir aser Ladakh tentet.



December 11, 2023 nü Parliament House, New Delhi nung Congress Tir aser Rajya Sabha nung Opposition Lenir, Mallikarjun Kharge indang chamber nung pa leniba nung opposition lenirtem senden amendang tangokba noksa nung angur.

Centre sorkar tenüng nung court nung Attorney General R Venkataramani aser Solicitor General Tushar Mehta nati ken o jembia liasü.

Supreme Court-isa Centre sorkar dang sangküm September 30 tashi nungbosa Jammu & Kashmir nung



## TIR YIMYIM YIMOBILEM (EDITORIAL)

DIMAPUR SANGTENNÜ, DECEMBER (LUCHII) 12, 2023

### Aonung benjong

**A**sen lima nung tang amai küm tatem aser temekong mapang aruba ya nisung ajak atema benjong mapang amai akümer, kechiyong Khristmas aser küm tasen benjong dang masü saka ibai kibakiyimba mapang lir, anungji yimti tulu nungbo nisung aika kasa anogo nung kiyir benjong ana asem nung adentsüsa akümer. Item benjongtemji dang masü saka tanü asüng tang ama benjong mapang nisungtemi ayongzüka amungba benjong kaji aonung chiyongtsü tapu balala yanglúa ayokba benjong ya asütsü. Iba benjong yabo tanga benjong amato masü saka nisungtem anüngdang mapa ajak temer aonung sütoksünema benjongtepdkstsüsa asoshi ayongzükba sentong ka lir. Atangji, iba aonung benjong ajanga anguba tajangzük tulutibajibo chiyongtsü tapu balala yanglúa ayokertemji asütsü. Kasa chiyongtsü yanglúa ayokba donkanji anüngdang lapok nung shinga marutsü saka aonungbo nungtepa arutsü. Ano, pei ki toktsür aonung benjong nung pelateptsü atema arurtemja kidang soruchioka chiyonga mekazüi aonung benjong nung aruagi pei kinunger aser medemertem den chiyongtsü tasen chidanga chiyongtepba ji sen endoka mesasa tepela aser anisüngzük anguba tesem aser mapang ka asütsü. Aji oda, joko asen lima nunga anüngdang ayongzükba benjong dang nungibo aonung ayongzüka akaba benjongan teimba, tajungba aser telongsuba kümogo. Joko, kiyir benjong nunga temeshi kiyimba sentong anüngdang tenla kidang agirbo aikati chiyongba sentongbo aonungang agir. Ashiko, ibaji aonungang light sentsü tapu balala agi benjong aliba tesem topur tajungba ngudakstsüsa asoshi asütsüa akok. Iba denji ano aonung kiyimba benjong aliba lagi tejaokertema anüngdangbo pei mapa inyaker mapang shitak nung kiyir benjong lagi chiyongi otetter. Aji oda, asenok ya tsümar amato aonung longsunüba nübortem kümogo. Ajisüaka, aonung benjong amongbaji amajok nung shi azü pelaba benjong ka masü saka pei kinunger aser medemertem den chiyongtsü tajung chidanga pelatepbä mapangang ka lir. Ano, aonung benjongtem rongnunga chiyongtsü tapu balala yanglúa ayokba benjongji nisung aika atema küm nung khen kibong ajunga yimdonglen külemei senzüa chiyonga pelatepbä mapang ka asütsü. Item aonung benjongji Kohima aser Dimapur nung yimti tiyong nung lapoka yur nübortem adenshidakja pelatepdakstsüba angutsü. Ajisüaka, asen lima nung tang tashi timtem kaji yimti yimdong aser moapu nung aonung benjong ayongzüka liaka shingaia item temekettem nungji metsümeshitsüba indangbo tebilema mobilemer. Ibayongji, aonung nisungtem adenshia chiyongdakstsüsa aser pelatedakstsüsa atema sü ki noklang junga yanglur awazür aser nisungtem chiajemer metsümeshiba ajakji aonung asünungji tesangwa kanga malidak kinüklen orr endoker. Iba lagi anepdangbo aonung benjong alidakji ajanga ao majung tezüknem menemer. Asenoki asen temang merüksü, topur jungdakstsü , süoshi agitsü, gari tajung alitsü aser English jembitsüba ajakji meteta lir, anungji temeteterbo temeteter saka asenoki metetba ama asenoki asen alidak lokti nung inyakba mapatempo memetetertemi inyakba dang nungi tamajungba lir. Ibayongji asenok ya anarongdena asenok temang merüksü metetba dang ashi asenoki asen alidak, asen kima, asen kiyong aser asen yimti merüksübo memetetba purtem amai asenok alir. Joko, asenoka asen alidak merüka ayutsübo ashitsüla aser itemji nübortem dang district administration ajanga tapet nisung anir arua sayudakstsüsa. Atangji, tangbo government nung ketdangsertemia aonung benjong alitsü temelaba agütsür dang ashi, koma alitsü ta asüba sentong yanglutsüba nungbo temulung magütsür. Iba lagi tesem aika nung aonung benjongji yi jemba aser das asayaba benjong amai kümduktsür. Ibabijo aiben tepela benjong masü, raratep manenba benjongan ka asütsü. Iba benjong nungji kodaser kibong rangben oa anisüngzüka mener chiyongtetsü ? Item ajakji asadanga aonung benjong ya asenok assoshibo rongsen yangludak aser tepela aser telongjem angudak asütsüsa, government nung alirtem aser lokti lenirtemi sentong tipdema renemtsüla aser nübortem aonung benjong.

## OLEMSABANG

### LENNIR TAJUNG KATI PEI MAPA ZÜBAZÜBA-A SENZÜKA MEYUTSÜR

~ L. Kika Pongener.

(*Yashi adok nungi...*)

Aji oda, pei ajangzüktsü aser pei sadem-sadema tenzüktsüba lenmang melira, pei nem nungloksüba mapa nung, metetsümonga tamakok aludakstsüba lennir jagi, pa/la tenzükba loktiji kodanga renloka tejakleni modakstsütsü. Aji oda, asenok lokti nung tenzükba ya pei ajangzüktsü asoshi tenzüker masü, saka aseni tenzükba loktiji jungdakstsütsü, saka asen nijabo akoksatsü...ta angateter tenzüktsüla. Atangji, asen nubu, mapang aser sempet tajungtiba agi, bendanga agüja tenzüktsü atema dang nubur-i shimtet...ta angateta, pei tashi agi akokba tashi bendanga agüja tamakok maludakstsüi tenzüktsüla.

Ano kangasa tesasatsüka, nisung shia sempet balala asünung, lennir karbo tia maka sempet tamajung, pei adenba/tenzükba lokti nung putepa, longjema, tashi-itá aliba aji maginuba...Saka kodaser meputepi, melongjemi alitsü aser lokti longjema tashi-itá alibaji kodaser raksatsü...Iba sentongji tang atonga nubu yima, kipoksema, jajaba lennir karbo alitsü akok. Aor shin o ka..."Manga (House Fly)-ibo teshinem menemba tesem nung dang linuba ama"...Pa/labo lokti nungji teti petsaperonga, meputepi, alitsüba sentong dang atongba lennir karbo alitsü akok. "Shiranger bang-dang Shi-a majung...Ango-a majung"...ta asüba ama...Oda pei-i inyakba dak alaka, tangari inyakba mapabo pa/la tsüngdang kata tajung mali..."Songtokra mangtsüng-song aser koktenra leptsüng-meki"...ta asüba ama...'Ya-a majung...Ajia majung'. Oda koba mapa nung pa/la ajangzüktsü aji dang tajung. Iba ama tangatetba tila, pei asoshi dang bilemba lennir adenba/tenzükba lokti nungji kodanga sunepa longjema malitsü. Atangji, lennir karbo Tsüngrem aser nuburi temulong lemteta, tenung jateta shimbä ama, Tsüngrem aser nübur mulong achitsüsa bendanga agütsür tenzüktsü melena, pei tenzükba lokti inyakym/sentong ajak nung mulong masü, tenük masüng, tenung sena dang jembia, pei nem nungloksüba mapa, atsüayunga nemnemshinema dang inyakba lennir karbo alitsü akok. Aji oda, kechi mapa sudir suaka, atsüayunga nemnemshinema inyakba nungji pa/la-a temoatsü malitsü aser loktijia tajangzük masütsü. Iba ama tangatetba tila (Narrow Scope) aser pei ajungtsü dang bilemba (Selfish) lennir lagi pai/mai aniba lokti-ji tejakleni modakstsütsü.

Tanü asen lima nung, pei ajungtsü dang bilemba, pei ajangzüktsü dang bushiba, lennir teimba aliba agi lokti aika temai madok telung nung khangshir. Koba lima, yimtsüng, jila aser lokti nung pei atema tang bilemba lennir lidir, iba loktiji kodanga renloka tejakleni maotsü. Iba telok nungji teti meputep, tsükchitep aser telemsa agi sunga alitsü. Anungji yimsusur, Tsüngrem tenzüker aser lokti lennir ajaki tensa tia ajak nung bendanga agüja tenzüktsüla. Aji oda, pei tajangzük alidang, mesüra pei mulong asütsüsa asüdang tang pelaseta, temulong agüja tenzükba lennir ka masütsüla. Hau-nii...Mimchir dang asünung, shinga-ia ajak shitak aser tabensabo meinyaktettsü...Saka pei akokba tashi yari bendanga agüja tenzükra aji agi teperi. Ano lokti lennir ajaki angatettsübaj...Aseni asen nem nungloksüba mapaji koka/jeta meinyaktettsüsa sura, pei sasa angateter, asen meji nung lokti ka tim-medemdakstsü, tangar mapa akoktsüpur nem mendenji azüngteta yutsütsüla. Asen meji lokti ka tejakleni moodakstsüi rahjangmekümdakstsüsa. Atangji, lokti lennir ajaki pei tenzükba mapa kanga akümtsüba tenzüktsüla aser pei amenba menden meraketa wazuka ayutsüla.

Iba Olemsabang nung lemsaba ken-o aser shisatsü ya iba ocet züluri  
bilemba ken-o ama tazüngeri angateta agitsü mepishir

## Egypt nung nisung 7,000 dak temai Khrista agizük: Michael Youssef



Egypt yimtiba, Cairo nung ayongzükba evangelistic sentong ka nung pastor, Michael Youssef-i jembidang tangokba noksa nung angur.

**December 11, 2023:** Tang aruba liasü. Ayaterm tashi Middle East nung tensa mejungi liaka Egypt yimtiba, Cairo nung ayongzükba evangelistic sentong ka nung nisung 17,000 dak tema aden aser nisung meyirjang aikati Yisu Khrista agizükogo.

Iba sentong ya pastor, Michael Youssef leniba nung agia liasü.

Interview ka nung jembidang Atlanta, Georgia nung aliba Church of Apostles nung pastor, Michael-i, November ita nung Egypt yimtiba, Cairo nung ayongzükba sentong nungji nisung 6000 shi adentsü, ta onoki imlaa liasü, ajisüaka nisung 17,715 aden aser iba nungjagi nisung 7,850-i Yisu Khrista agizük, ta metedaktsü.

Tang Middle East nung tensa majungba den külemi Egypt nung evangelistic outreach sentongtem tenokdangba lir, anungji nisung aika iba sentong nungji madentsü, ta bilema liasü.

Arrshi küm 75, Michael-i, "Tsüngremi mapa inyakbaj onoki nguogo," ta ashi.

Pastor Michael ya Leading The Way nunga executive president inyaker.

"Khristantem jenti adenshi. Parnokji kü o angatsü mesüra tanga kar atema aruba masü saka tanela nung tzüraba agi

Asenok ajak menen khu agi neneta lir. Iba osangji kanga tongmelang. Ni iba ama evangelistic outreach sentongtem nung shilem agidang osangtajung indangindanga sayur," ta pastor-isa metedaktsü.

Michael Youssef ya Egypt nung aso aser Lebanon nung ali. Middle East nung nübertem nem Khristan yimsü agizükdastsü tejangraba tulu nung pai inyaker.

Khrista osangtajung tashi medenibo Middle East region nung chichiba tesünep malitsü, ta pai ashi.

"Onoki yimjung atema sarasademer; nükjidongji ibaji lir. Telok anapronglai (Israel-Gaza) Yisu metettsü atema ni sarasademer, Yihuda nungeremi Pa (Yisu) ya Messiah ta metettsü aser Muslim nungeremi Pa metettsü atema ni sarasademer," ta pai ashi.

"Muslim nunger meyirjang aikati Khrista dangi arudar, ajisüaka nenoki iba osangji kodanga osangkakettem nung mangutsü. Parnoki (Muslim nunger) pongmang-mangdang nung Yisu anguba sülen parnok meyirjang aika Khrista dangi arudar. Item amaji atalokdang aser osangtajung sangdongba mapang nung yangji yimjung alitsü atema onoki sarasademer. Ajisüaka atangji nungbo, Yisu medenibo yimjung malitsü," ta pai ashi.

Tatem anogo dak sendakba nung Michael Youssef-i Mathi tapu 24 nung ajemdaker tatembang anogo temaitsüem metedaktsü.

Michael Youssef-i, tang alima nung tatalokbatem ajanga ya Laishiba nung shia aliba ama tatembang anogo kanga kera arudar ta ni bilemer, ta metedaktsü.

"Kibubai, tatembang anogo anasa nosoba tashitsü alitsü, aser iba ya tamangertem atema asütsü, ta ashir. Mamangertem atema iba ya aonung auer aruba mesüka asütsü," ta pai ashi.

(Maneni tapak 8 nung...)



Study Tour ka ama Eastern Bible College, Dimapur nungi tesayur asem-i anir parnok 35 tashi Molungkimong yimdak arua sentong balala agidang tangokba noksa ka yangi angur. College faculty Zubemo Lotha, Shinglong Konyak aser Ekonbeni Lotha nungeri anir kaketsirtem ya Molungkimong yimdak Khristan yimsü dak sendakba otsüren angazuka December 9-11, 2023 anogotem amungtsü.

## ANOGO ABEN TSÜNGREM DEN

### Tekülem

#### 2 Kor. 8:1-9 : Agütsübaji tekülem lir

Konang aser tamaren pa tsüngdang lir; Tekülemdakji tashi itta aser topur junga lir. T.Ken 96:8


Deobarji agütsütsü asoshi mapang tajung lir. Tamangertem külemi sentepba Kibuba külemtsü aser temoatsü agizüktsü aser Kibuba nem agütsütsü mapang tajung lir.

Asenok tekülem nung agütsübaji shilem ka lir. Ibai teti bener arutsüla kechiaser Tsüngremer nüber asoshi ibai maongka aser tepela ka lir. Khristan tagütsübaji tekülem nung inyaktsüba mapa ka dang masü. Ibai kanga tongtipang tekülem mapa ka lir. Asenoki ter shilem aser tenla bener arur, arogo mapa inyaktsü atema dang masü saka asen taküm nung Tsüngrem taochi aliba tepela telangzüba agütsüba lir. Ibai asenok ketangsüba nung shilem ka lir. Tsüngrem sentsüwangshi asoshi Tsüngrem sempettem amshiba lenmang.

Shirnoki Kibuba Yisu Khrista taochi metetter parnoki tamasa parnok taküm agütsür. Asenoki tenla bener pa kidangi arudang, Tsüngremi asenok moatsüba ama, pelaseta aser mulungsoa asenoki agütsüdi. Pauli asenoki mulungsoa agütsübaji Tsüngrem taochi sempet ta züngshi. Asenoki Pa temeim agizüker, asenokia Kibuba nem Pa tenüng nung alangba sentsüwangshi agütsütsüla.

Kibuba Tsüngrem, onok tenla chichiba tepela mapa aser tenüng asangba tekülem ama agütsütsü yariang; Yisu tenüng nung. Amen.

## Nebraska state nung putir ka tepset



Rev. Stephen Gutgsell aser pa inyakba St. John the Baptist Argo Tenka ki

#### December 11, 2023:

Amongnū (December 10, 2023) US kübok Nebraska nung aliba Argo ka amakdang putir ka tepsetogo, ta police-i metedaktsü.

Police-i ashiba agi, Amongnū anepdang 5:00 ako meta teyari meshia 911 call ka aruba sülen police iba tesemji tonga aodang parnoki Rev. Stephen Gutgsell aser pa amaksang na angu.

Michael ya Fort Calhoun nung aliba St. John the Baptist Argo nung putir liasü.

Arrshi küm 65, Rev. Stephen, Omaha nung aliba hospital kati anir oa yari, ajisüaka mekümküteti süogo aser tai tonglokja alisangji police ket nung lir.

Tesülen police-i, putir amaksangji Sioux City, Iowa nungi arrshi küm 43, Kierrie Williams lir, ta metedaktsüogo.

2007 küm Rev. Stephen Gutgsell-i tanga Argo ka

nungi dollar sen 127,000 auya tai tongloktsü, aser paia aibelenba nangzükba sülen pa nem senji tanaben agütsüdastsü aser tanga Argo ka nung lemzükja liasü.

Iba mapang nungji Argo lenirtemi, Rev. Gutgsell-i pai aibelenba nangzükogo aser tansütsü lesson agiogo, ta metedakja liasü.

Rev. Stephen Gutgsell tepsetba ken o bushisüngdanger Washington County Sheriff, Mike Robinson-i, pa tepsetbaji tamalen pa anema benokba ken o den sendaktepa mali, ta metedaktsü.

St. John the Baptist nung inyaker, Mike Fitzgerald-i, "Putir Gutgsell yangi küm 11 liasü aser pa kanga temeshi nisung ta ni bilem. Pai nübertem atema mapa tajung aika inyakogo. Pai Argo osangkaket tajungtiba nung adoktsü atema inyaka aruogo," ta metedaktsü.

**AO OSHI ANGAZÜKDAK:**  
**TANÜ ANGAZÜKTSÜBA OJANG**
**Sentsü**


(adj) tereprangtsü balala (colour)

\* Asenlai sentsü temerem kanga sapur.

**Sentsüh**

(n) pi nem tagütsütsü aliba (debt)

\* Ni sentsüh aika tsüha lir.

**OLONG PAITEP # 6641****TIPLÉN**

1. Inyaker ajangtetba  
 3. Bangsemo adokdak  
 6. Shitak mesüi inyak  
 7. Ya mimong nung angur  
 9. Reprängzük  
 10. Tasola  
 11. S \_\_\_\_\_  
 13. Yagi ajak ashioctsür  
 15. Ki aokba oset  
 17. Ak shi nung inokba tasen  
 18. Ishika

**LANGTSÜNGLEN**

- (3) 1. Meshidak  
 - (5) 2. Tanaben soshir  
 - (7) 3. Iba anogo  
 - (3) 4. Meshi  
 - (4) 5. Yagi mi tsükloker  
 - (5) 6. Shi tapu ka  
 - (4) 7. Yagi ayimer saka ozü masü  
 - (3) 8. Ajokba shiruru ka  
 - (7) 9. Ajokba shiruru ka  
 - (7) 12. Inyaktet  
 - (5) 14. \_\_\_\_\_ hi  
 - (3) 16. Akümlü nungi pilar

**OLONG PAITEP # 6640 TELANGZÜBA****TIPLÉN :**

1. Telok, 4. Aluru, 6. Ozüng, 8. Emk,  
 9. Kin, 10. Teti, 12. Süür, 13. Jen,  
 14. Ola, 16. Talak, 17. Mazük.

**LANGTSÜNGLEN :**

1. Tenükjang, 2. Luden, 3. Kiocksü,  
 5. Lenti, 7. Tajangzük, 11. teronem,  
 12. Sempa, 13. Jahaz.

**NAI-A YA METETTER MA**

India Bike Week 2023 nung Harley Davidson indang X440 custom-built tapu 4 angur. Iba ya TNT Customs ajanga yanglushiba lir aser parnoki Harley-Davidson X440 khenyongi balaka melenshia yanglua lir. Harley-Davidson nung jenjang talangtiba motorcycle ji X440 lir aser iba indang jenjang ya Indian market nung ex-showroom price 2.40 lakh nungi Rs 2.80 lakh lir.

**Dalai Lama-i anogo asemnü atema Sikkim semdanger**

**Gangtok, December 11, 2023 (Agencies):** Küm 13 lir külen 14 buba Dalai Lama-i anogo asemnü atema Sikkim semdangi arua lir.

Gangtok nung aliba Libing Army Helipad nung pa pelaa agizük. Iba mapang Korchen Rinpoche, Lachung Rinpoche, Gonjang Rinpoche, Chief Minister Prem Singh Tamang, Krishna Rai, SLA Speaker Arun Kumar Upreti, Chief Secretary V.B Pathak, IAS, Director General of Police A.K Singh, IPS, Additional Chief Secretary, Home R. Telang, IAS aser Major General Amit Kabhiyal, GOC nunger liasü.

Iba dak alia Tibetan Parliament, Tibetan Settlement Office aser Local Tibetan Assembly nungi ketdangsürtem aser teshimtet nübotem aden.

Gangtok nung aliba Paljor Stadium nung aliba Bodhisattva nung Dalai Lama-i Gyalsey Thokme Sangpo indang 37 Practices sayutsü aser Karmapa Park project o Gyalwa Lhatsun Chenpo Statue project atema lung azüngtsütsü.

Dalai Lama-i Brihostibane tashi Gangtok nung amongtsü aser iba sülen Siliguri, West Bengal-i aotsü.

Mezungbo Dalai Lama-i taküm October ita Sikkim semdangtsüba liasü saka ajungan tzümetstüng lendong ajanga nisung aika astüba aser aika talidak tokstsütsüa akumba ajanga iba sentong athi.

Libing Army Helipad nung pa pelaa agizükba sülen Sikkim nung monastery balala nungi monk

**Manipur Youth League-i Dec 20 nungi Jan 9 tashi jajatsü****Imphal, December 11, 2023**

**(Agencies):** Manipur kubok valley district punguprong nung December 20 nungi January 9, 2024 tashi national regeneration atema jajatsü ta Manipur Youth League (MAYOL)-i meteddkatsüogo.

December 20 nü Kangla Fort nungi jaja tenzüksü aser January 9 nü Canchipur nung

aliba Gambhir Singh Park nung nung yaritepa takok ngudakstsütsü ayongzükogo.

Iba sentong nung Imphal West, Imphal East, Thoubal, Bishnupur aser Kakching district ajak asemtsü ta parnoki ashi.

MAYOL-isa civil society organisations, Meira Paibi aser kaketshir teloktem dang sentong

District pungu nung tesem balala nung sendentem amentsü ta parnokisa shisem.

**Thoubal District nung prangpong-injang aika apu****Imphal, December 11, 2023**

**(Agencies):** Manipur nung Thoubal District nung sepaitemi tanü prangpong-injang aika ngutetogo ta Assam Rifles-i ashi.

Sepaitemi Salam Patong yimtsüng nung mita aodang CMG 1, Hand Grenades 4, Chinese grenades 4, Stun & Tear Grenade 1, 09 mm pistol 1, locally made pistol 1, shotgun shells 6, unexploded heavy calibre ammunition 1 aser SLR launching tube 1 nguet.

December 9 nü Manipur police-i DM College of Science kaketshir ka kümzüka liasü. Police-isa Yumnam Huidrom



yimtsüng nung mita aodang iba kaketshir pur aoer nisung 8 den prangpong-injangtem apu.

DM College kaketshirji December 8 anüngdang New Boy's Hostel nungi pur aoa ashi.

**GOVERNMENT OF NAGALAND****DIRECTORATE OF PRISONS****NAGALAND: KOHIMA.**

NO.PRI/HQ/Ration-32/12 (Pt-I)

Dated Kohima, the th Dec '2023.

**TENDER NOTICE**

Sealed tenders are hereby invited for supply of Ration and Allied articles to the various Jails in Nagaland during the Financial Year 2024-2025. The last date for submission of the tender form is 24th Jan'2024. The tender papers will be opened on the same day at 12.00 pm at Prison Head Quarter.

Tender forms may be collected from the Office of the Prison Head Quarter from 10th Jan'2024 during Office hour on payment of Rs.1,000/-.

Sd/- (IMTIANGSHI AO) NJS  
 Inspector General of Prison  
 Nagaland, Kohima.

**GOVERNMENT OF NAGALAND  
DIRECTORATE OF HEALTH & FAMILY WELFARE  
NAGALAND: KOHIMA**

NO.DHFW-21/FSSA/Workplan(MoU)/25/2023-24/72

Dated: Kohima the 11th Dec' 2023

**NOTIFICATION**

In pursuance to this Office Advertisement No.DHFW-21/FSSA/Workplan (MoU)/25/2023-24/10 dated 26th Oct' 2023, the Department on the basis of aggregate marks obtained in the interview conducted for Food Safety Officer and Data Entry Operator on 9th & 10th of Nov' 2023 is pleased to recommend the following candidates in order of merit for appointment to the contractual posts of Food Safety Officer and Data Entry Operator for a period of 5 months under Nagaland Food Safety Project (MoU) 2023-24 which is co-terminus.

**Food Safety Officer Selected Candidates**

Merit	Roll No.	Name of the Candidate	Place of Posting
1.	5	Smt. Zavelü Kezo	CMO Office, Longleng under FSSA Mokokchung Zone
2.	16	Smt. Yelika Yephthomi	CMO Office, Tuensang under FSSA Mokokchung Zone

**Waiting List :** (Validity period for waiting list will be for 3 months from the date of result declaration)

1. Megokhotso Kuotsu - Roll No. 46
2. Metsutu - Roll No. 6

**Data Entry Operator Selected Candidates**

Merit	Roll No.	Name of the Candidate	Place of Posting
1.	1	Shri. Keduoselie Paphino	CMO Office, Kohima under FSSA Kohima Zone
2.	52	Smt. Chonglio Khamniungan	CMO Office, Tuensang under FSSA Mokokchung Zone

**Waiting List :** (Validity period for waiting list will be for 3 months from the date of result declaration)

1. Shri. Vikethotoulie Sekhose - Roll No-11
2. Shri. Tiakumzuk Longkumer - Roll No-44

**Note\*** Acceptance letter should be submitted to the undersigned on or before 18th Dec' 2023, delay in submission of the acceptance letter shall not be entertained.

Sd/-

(DR. RITU THURR)

Principal Director & Addl. Food Safety Commissioner  
Directorate of Health & Family Welfare

**Onoki akhangba mataloktsüra pua alir kata takum mechioctsü: Hamas**

Gaza City, Luchii/December

11 (Agencies):

Onoki akhangba mataloktsüra Gaza nung pua aliba kata takum meyoktsü, ta Hamas-i tekumdagtsü shiogo.

"Tepuokdak alirtem den memelentepi, ken o tangatetep kati marui aser onoki ashiba mangai fascist tsükchir aser par lenirtem.... mesüra parnok sülen par bhukumer temi par nisung takum anir motetsü," ta Hamas odongtar Abu Obeida-i audio clip ka par military wing indang Telegram channel nung Deobarnü prokshi.

Hamas aser danga telungpur teloki tang tashi pua aliba nisung 138 mechi ketdangsürtem dang yimya balala nungi ajungshir.

Hamas teloki apuba nungi chiocker anünga alirtem kumzüksü asoshi mera ajak agitsü ta Israel-i aiben jembia arur. Tang tashinung nisung 110 shi chiokogo, saka hopta ka asoshi rara anena ataba mapang tembangba sülen Israel-i maneni Gaza south tsütsü bomb poklokja alilen nungia amaker aser refugee camp tem nung tank temi injang khaloktsü.

Hombarnep Israel-i tayimtsü amshia Gaza south tsütsü Khan Younis aser Rafah yimtitem maka liasü. October 7 nü Palestine nunger Hamas teloki Israel south tsütsü nisung 1,200 tepsetba sülen tayang kepzüka Israel-i Gaza amakdang civilian 18,000 junga tepsetogo aser nisung million 1.9 pei ki yutsür tesem balala nung prokshia lir.

Parnok timtemba ya tangbo tajungba makumtsü, kechiaser

rara ya tang matemtsü, ta Israel indang national security adviser Tzachi Hanegbi-i Deobarnü ashi.

Gaza tiyonglen Bureij aser Maghazi refugee camp tem nung Israel tank temi injang khalokja liasü. Maghazi ya nisung aika aliba refugee camp ka lir aser yangji Deobar aonung amakdang nisung 23 tepsetba osang lir.

Azüdokshi nungi jena aortem Gaza south tsütsü Egypt den arütsü anasa tesem tilaka nung tsüngtena lia Israel mitkar temi amak, kong chiyongtsü, tajemtsü tzü aser mozü agi kanga anünga lir.

Linük balalai ceasefire alitsü ajungshiaka Israel Ato Kilonser Benjamin Netanyahu-i Hamas nunger mesamatsü tashi amaktsü nangzüka lir.

Pa nem White House ajanga mitkar tsütsü teyari tasen agütsür, koba Israel dang tank indang injang 14,000 ayoktsü asoshi congress majangi temelaba agütsü.

United Nations nunga US-i maneni Israel nem jong tongloktsür aser tangsa ceasefire alitsü pangzung ka benokba Hokulbarnü Washington-i agienja liasü.

Israel-i iba nükjidong tongtetsü asoshi US-i anogo latetja mali.

Mapang kobika raratsüar iba atema telemtetba Israel-i dang agitsü, ta US Secretary of State Antony Blinken-i shia liasü.

US nungi nok-nü tasen yokba len tom nung lia

Netanyahu-i Hamas telok dang parnok nok-nü yutsür temai adoka bendaga agütsütsü Deobarnü ayongzüka liasü.

Ajisüaka Hamas tang tashi teimla mesamai lir aser parnok indang political bureau nungi züngsem kati ashiba agi, par teloki Israel sepaitem den takok ngua rara arur aser par mapang tatemleni arur.

Kasa mapang Gaza Strip atema rara sülen kechi asütsü ta sentong yanglutsü asoshi Israel Ato Kilonser Benjamin Netanyahu-i miim telok tilaka tenteta lir ta osang kar ajanga ashir.

Iba telok nung Israel Defense Forces (IDF) nungi Israeli national security adviser Tzachi Hanegbi aser minister of strategic affairs Ron Dermer, Mossad aser Shin Bet nunger ya züngsem lir, aser Hanegbi ya tekolakba lir.

Israel envoy to US, Mike Herzog-a iba senden nung dena liasü. Iba telok ya taoba mapang pezüben ajurutepogo aser tan hopta ano khen ajurutepstsü. Yangji jembishinüba osang US national security advisor Jake Sullivan nem agütsütsü asü masüar ano mejangja.

Gaza nung rara sülen ki ojen yanglutsü asoshi Israel-i Saudi Arabia aser UAE anioka jembishinütsü akok, ta Henegbi-i ash.

"Palestinian Authority aser education system nung temelensi tulu nüngdaker. Itemji memelensi tashi Israel-i maneni timtem ajurutsü," ta Israeli minister Dermer-i ash.



MULUNGNEN O

Onoki teti meima aliba asür *Mootula Aier* mapang tatsüka shirangdang aser la iba akümlı nungi piladang kija, kibong, arogo aser lokti shirnokisa anisüngzük o, sarasadem, ali rongsen, shisatsü aser aria bilemba mulungsentsü agi ozü mulung zürepa alidang yaritepogo, ajak dang kanga pelar. Nenok mapa tajung onok mulung nung teti alitsü. Tsüngremi nenok ajak moajangma.

Temeim ojala, adianutem aser kinungertem



Mulungnen O

ASO :  
16-11-1916ASÜ :  
7-12-2023

Onoki teti meima aliba tsürabur *Asür Talikaba Longkumer* (Molungkimong) ajungben iba akümlı tembanger onok mangyim jashi khuret tulu agi sünger alidang kija, kibong, arogo, yimten aser lokti tentet balala nungi nübu, rongsen, shisatsü aser aria bilemba temeim aser sarasadem agi ozü mulung sunepdakja asükhü mapang nungita yaritepa asoshi nenok ajak dang ozü mulung taroktiba nungi kanga pelaba lemsateper.

Nenoki yariba asoshi ozü tsüngtong aruagi nenok den tepele melemsatet nung iba osang ajanga nenok ajak dang tepeleba lemsateper. Tsüngremi nenok ajak moajang ta onoki sarasademtsü.

Temeim Chirnurtem, Semchirtem aser Kinungertem.

**Philippines-i China indang ambassador jaok**

Manila, Luchii/December 11

(Agencies): Hopta tatemi mangatetep adoker aliba South China Sea nung China nunger rongtem den mangatetep adokba sülen Philippines-i ashiba agi, parnoki China indan ambassador jaokogo aser kettangsür ya mintoktsü atema asadangdar.

Manila-i ashiba agi, Scarborough Shoal nung

Philippines nunger angopurtem dangi supply bener yokba mapang Honibarnü parnok indang rongtem dak China nungertemi water cannon khalokja liasü.

Deobarnü Spratly asetkong kübok Second Thomas Shoal nung amenoka laiba Sierra Madre nung sailor

(Maneni tapak 8 nung...)

tem angi osütsüt bener yokba mapang rongtem dak China nungertemi water cannon khaloktsü aser Chinese coastguard indang rong den tsüktepa liasü, koba Beijing-i Manila dak tai tongloksüogo.

Social media nung lemsateba noksatem ajanga Philippines indang rong ya

kichiba jaksar aliba aser deck raksar aliba sayuogo.

Foreign ministry otongdar Teresita Daza-i Hombarnü osangbenertem den sensaksema mapang ashiba agi, Manila-i iba tatalokba dak sendakba nung diplomatic tashishiba tasen ka benokogo aser China indang ambassador jaokogo.

## Wokha nung 3buba winter open Airgun shooting tetoktepba asayaogo



**Dimapur, Luchii/December 11 (TYO):** Airgun Sporting Association of Nagaland-i ayongzüka December 8 nü Likya Colony Wokha nung 3buba winter open Airgun shooting tetoktepba asayaogo.

Iba sentong nung Sector Command 40 Assam Rifles Lt. Col. D.S. Kushwah alakteta jaoker liasü.

Sentong nung o jembiba mapang alakteta jaokeri, Naga nungertem dak asayatsü asoshi tasodang nungi sempet ket asor iba indang lemsatepba den paisa Naga nungertem dang temaba jenjang tongteta state aser linük asoshi konang tetushi bener arutsütsü ajungshia liasü.

Maneni pai, Naga nungertem dang Indian armed

forces nung adentsü ajungshi aser ashiba agi, defence dak alia army-i coaching institute tajung agütsür, kong India aser international coach tajungtemi training agütsür.

Pai ashiba agi, state aser district jenjang nung takok tajung anguba asayartem iba amala Army sports institute tem

atema apply asütsü asoshi temsüa lir. Paise, army nung army, navy aser air force amala force balala lir ta metedaktsüba den international jenjang nung shilem agitsü atema lenmang sadema lapoka alibatem indang lemsatepa liasü.

Sentong nungsa lokti pela agizükba o jembiba mapang ASAN tir Ajamo Odyuo-i, 1buba Winter Shooting

Competition Runners Up-i Nagaland Olympics nung bronze medal ngua liasü, ta ashi. Paise, ASAN-i ayongzüka asayaba 2buba winter shooting tetoktepba nung takok angusang tang National jenjang nung liasü.

Taküm iba tetoktepba nung shooter 28-i shilem agia liasü. Tetoktepba ya Nchumbemo Patton-i akok aser tanabuba aser tasembuba jenjang nung Mhathung Murry aser Yibomo Odyuo na liasü.

Iba sentong ya Z. Achamo Ovung lenisüba nung agi aser Rev. Ngangnen-i Tsüngrem temaotsü meshizüka sarasademba den Chenithung Yanthan-i tepela anküp o jembia liasü.

## Bashirtang mezüngbuba England team nung züngoksemogo

**Luchii/December 11, 2023 (Agencies):** Arishi küm 20 tain

Somerset off-spinner Shoaib Bashir tang mezüngbuba India den Test asaya pongu asayatsü aliba atema England team nung züngoksemogo.

Bashir June ita mezüngbuba asayaba sülen tang tashi nung first-class trok dang asayar lir.

Kasa mapang nung Surrey fast bowler Gus Atkinson aser Lancashire left-arm spinner Tom Hartley nata Test asaya atema tang mezüngbuba team nung züngoksemogo. Tena white-ball cricket asaya nungbo England tenüng nungi asayatokogo.

Linük ana tsüngda mezüngbuba Test asaya ya

Hyderabad nung January 25 nungi tenzüka asayatsü.

Batter aser vice-captain Ollie Pope aser left-arm spinner Jack Leach nata yiruba ajanga masayai lir tang team nung züngoksemogo.

Pope ya taküm Lord nung Australia den tanabuba Ashes Test asayaba mapang tapu yiru aser Leach-a teberem yiruba ajanga iba asayamung nung shilem magititi liasü.

India den asayatsü aliba test asayamung ya Ben Stokes lenisüba nung asayatsü. Pa ODI World Cup tembangba sülen temekok tabelen surgery agir lir.

England Test squad: Ben Stokes (capt), Rehan Ahmed,

James Anderson, Gus Atkinson, Jonny Bairstow, Shoaib Bashir, Harry Brook, Zak Crawley, Ben Duckett, Ben Foakes, Tom Hartley, Jack Leach, Ollie Pope, Ollie Robinson, Joe Root, Mark Wood.

### Fixtures

#### January

25-29 1st Test, Hyderabad (04:00 GMT)

#### February

2-6 2nd Test, Visakhapatnam (04:00 GMT)

15-19 3rd Test, Rajkot (04:00 GMT)

23-27 4th Test, Ranchi (04:00 GMT)

#### March

7-11 5th Test, Dharamsala (04:00 GMT)

Zlatan AC Milan-i board züngsem ama meyipa arutsü akok

**Luchii/December 11, 2023**

Milan pur iba season tang tasembuba jenjang nung lir. Asaya 15 sülen parnoki point 29 ngua lir. Milan pur asaya teku kokogo aser asaya ana draw asuba den asaya pezü nung tamakok nguogo.

AC Milan pur tabel nung temaba jenjang nung aliba Inter

dang nungi point teku agi tajemba lir, shirnoki asaya 15 sülen point 38 nguteta lir. League nung tanabuba jenjang nung Juventus pur lir. Parnoki asaya 15 sülen point 35 ngua lir.

Maneni AC Milan-i UEFA Champions League nung tatembangbuba asaya nung Newcastle pur kokra aser kasa telok nung French champions PSG pur German club Borussia Dortmund mekokra parnok knockout stages-i aitsü.

Fotball asayaba dak sendakba nung Ibrahimovic temaba jenjang nung aliba league aika nung asaya senziügo aser pai tajangshiba aika bena lir aser pa Milan-i board züngsem ka ama iba club nung tanaben dena club inyakyim arura pa ajanga club kanga ajangzükdaktsütsü.

## Tripura nung Khristmas anogo... (Tapak 5 nungi...)

Tongbang rara aser menoknok ama lendongtem ya teti ataloka arur, ajisüaka tawa item lendong kanga bulua atalokba ajanga tatembang anogo kanga kera aruba temaitsü sayur, ta pai ashi.

Tang Russia, China aser Iran linüktem longjember inyakba asenoki angur; tesüiba mapang nung iba amaji kodanga matalok. London, Paris aser New York yimti yimdongtem nung lokti adenshia Israel anema longkak aiter. Sydney Opera House kima adenshia 'Gas amshia Yihuda nunger südakjang' ta ayimdener. Iba ya taoksatsüka lir. Tatembang anogo anasa aruba, ta nibo bilemer," ta paisa metedaktsü.

Tang alima tensa mapangnisunger shisatsü ainba, nütsüng arenba aser rara ajanga Noah mapang atalokba ama sayur, aser iba ya-a tatembang anogo temaitsü lir, ta pai ashi.

Taruba ita aika Michael Yousef-i Veracruz, Mexico, New England, Jamaica aser Sydney yimtitem nunga evangelistic sentongtem ayongzüka akatsü tebilemba lir.

## Philippines-i China indang... (Tapak 7 nungi...)

Philippines nung China indang ambassador Huang Xilian ya magizüker ta ashiba den iba ken o ya kanga süoki ia asadangtsü nüngdaker ta lai osangbenertem dang ashi.

Tir Ferdinand Marcos Jr-i, tzüyim nung Manila indang litsü kümzüka ayutsü atema jenjang tapet agitsü ta tenangzükba agütsüba sülen Daza-i iba osang lemsatepa liasü.

South China Sea, koba tuluba ka China-i parnok meyong ta ashir iba tzüyim nung mangatettep adokba sülen süoki ia agiba metedaktsü.

## BILEMDANGANG

"Timla agi nisung taküm ka anir."